

Baung ekor merah, Aligator Gar disita jabatan perikanan

BH 9/10/24 Pg 16

Ipoh: Dua ikan baung ekor merah, selain tiga Aligator Gar masing-masing dianggarkan seberat tiga kilogram (kg) antara 49 ikan larangan atau ikan pemangsa (invasif) yang disita Jabatan Perikanan Perak, selepas pemeriksaan premis ternakan ikan hiasan di Kampung Tawas di sini kelmarin.

Pemeriksaan menerusi Operasi Pemutihan dan Kesedaran Ikan Larangan di Premis/Kedai Akuarium Ikan Hiasan di Negeri Perak itu antara lain turut menyita beberapa ikan larangan lain antaranya 42 ikan bongkok (*Geophagus*), guper catfish (1) dan flower horn (1) dengan anggaran keseluruhan bernilai RM8,300.

Pemilik premis berusia 40-an mengakui membela ikan predator berkenaan sejak 10 tahun lalu dengan alasan tidak mengetahui peraturan yang ditetapkan dan mereka diberikan amaran agar tidak mengulangnya atau berdepan tindakan mahkamah jika ingkar.

Pengerusi Jawatankuasa

Pembangunan Luar Bandar, Perladangan, Pertanian dan Industri Makanan negeri, Datuk Mohd Zolkafly Harun, berkata program kesedaran dan pemutihan itu yang dijalankan bermula 18 September lalu hingga hari ini, menyasarkan premis atau kedai akuarium ikan hiasan di seluruh negeri.

Sepanjang 2024 sebanyak 24 operasi pemantauan menerusi OPS Darat dihuat Jabatan Perikanan Perak di premis akuarium membabitkan kira-kira 30 premis akuarium di seluruh Perak antaranya di Ipoh, Teluk Intan dan Ayer Tawar.

Katanya, daripada jumlah pemantauan itu, 15 premis diperiksa yang membawa kepada rampasan 154 ikan larangan dengan nilai sitaan berjumlah RM13,000.

Beliau berkata, trend mengimport, memiliki, menjual, menternak dan mempamer ikan hiasan dari spesies, genus, dan keluarga (family) ikan larangan, khususnya di premis atau kedai masih terkawal.



Baung ekor merah seberat 3kg antara 49 ikan larangan disita Jabatan Perikanan Perak di premis ternakan ikan hiasan Kampung Tawas, Ipoh semalam. (Foto Muhammad Zulsyamini Sufian Suri/BH)